



REPUBLIKA E SHQIPËRISË
AVOKATI I POPULLIT
Seksioni i Veçantë



Adresa: Bulevardi: "Zhan D'Ark" Nr.2
Tiranë, Shqipëri

Tel/Fax: +355 4 2380 300/315
E-mail: ap@avokatipopullit.gov.al
www.avokatipopullit.gov.al

Nr. Prot.
Nr. Dok. 201700448/8

Tiranë ___/___/2017

Lënda: Rekomandohet "Marrja e masave të menjëhershme për ekzaminim mjekësor, dhe ushtrimin e riteve fetare e të paraburgosurit A. K., i cili ndodhet në IEVPenale "Shënkoll" Lezhë".

Drejtuar : Z.Arian HOXHA
Drejtor i Drejtorisë së Përgjithshme të Burgjeve

TIRANË

Për dijeni: Z.Eduard KURTI
Drejtor i IEVPenale "Shënkoll"

LEZHË

I nderuar Z.HOXHA,

Në këtë komunikim të parë me ju, urojmë suksese në detyrën tuaj sa të vështirë aq dhe fisnike.

Në Institucionin e Avokatit të Popullit, më datën 12.04.2017, ka paraqitur ankesë shtetasi A. K., nga Shkodra, aktualisht ndodhet i paraburgosur në I.E.V.Penale "Shënkoll" Lezhë, i cili ka ngritur pretendimin se, nuk i është dhënë shërbimi shëndetësor për t'u vizituar nga mjeku, si dhe nuk lejohet të ushtrojë besimin fetar që përfaqëson.

Mbi këtë shqetësim në respekt të nenit 63/4 të Kushtetutës së Republikës të Shqipërisë dhe nenit 19 gërma "b" të ligjit nr.8454 datë 04.02.1999 "Për Avokatin e Popullit", i ndryshuar, më datë 13.04.2017, me shkresën nr. K2/A25-3, kemi kërkuar informacion Drejtorit të IEVPenale "Shënkoll" Lezhë. Përgjigja e shkresës sonë nuk është kthyer jo vetëm në afatin 10 ditor të kërkuar, por edhe pasi kishin kaluar mbi një muaj.

Për këtë arsye më datë 11.05.2017, me shkresën nr. K2/A25-7, kemi kërkuar kthimin sa më parë të përgjigjes së shkresës tonë të datës 13.04.2017. Përsëri nga drejtoria e IEVPenale "Shënkoll" Lezhë është i mbajtur i njëjti qëndrim duke mos kthyer përgjigjen për informacionin e kërkuar lidhur me shqetësimet e të paraburgosurit A. K.

Theksojmë se në Institucionin e Avokatit të Popullit gjatë shqyrtimit të ankesave të paraburgosurve dhe të dënuarve në IEVPenale “Shënkoll” Lezhë, kemi konstatuar edhe raste të tjera të ankesave kur nga ana e personalit të Shërbimit Shëndetësor nuk është treguar kujdesi i nevojshëm për t’ju përgjigjur çdo kërkesë të të dënuarve që lidhet me shëndetin e tyre dhe në mënyrë periodike të ushtrojë kryesisht kontrolle mjekësore për të parë gjëndjen e përgjithshme të tyre.

Të drejtat e të paraburgosurve dhe të dënuarve për trajtim në shërbimin shëndetësor parashikohen në akte ligjore dhe nënligjore, dhe si të tilla mund të përmëndim:

Rregullorja e Përgjithshme e Burgjeve e miratuar me VKM nr.96, datë 09.03.2000, e ndryshuar, në nenin 30 të saj i cili bën fjalë për Shërbimin Shëndetësor shprehet në mënyrë të qartë se: *“Shërbimi shëndetësor duhet t’i përgjigjet çdo kërkesë të të dënuarve që lidhet me shëndetin e tyre dhe në mënyrë periodike duhet të ushtrojë kontrolle mjekësore për të parë gjëndjen e përgjithshme të të dënuarve dhe veçanërisht atë psikike”*.

Në nenin 5 të ligjit nr.8328 datë 16.04.1998 “Për të Drejtat dhe Trajtimin e të Dënuarve dhe të Paraburgosurve” i ndryshuar, i cili bën fjalë për Parimet Themelore, thuhet: *“Të paraburgosurit dhe të dënuarit trajtohen me dinjitet dhe duke respektuar të drejtat njerëzore të tyre”*.

Kurse në nenin 33 të ligjit të mësipërm, i ndryshuar me ligjin nr.40/2014, datë 17.04.2014 i cili bën fjalë për Shërbimin Mjekësor, thuhet: *Shërbimi mjekësor sigurohet gjatë gjithë kohës së qëndrimit në institucion nga Drejtoria e Përgjithshme e Burgjeve dhe mbulohet nga sigurimi i detyrueshëm i kujdesit shëndetësor, sipas skemës në fuqi. Personat e paraburgosur dhe të dënuarit me burgim përfshihen në kategoria të personave ekonomikisht joaktivë, në kuptim të ligjit në fuqi, dhe përfitojnë, pa pagesë, të gjitha shërbimet që ofron skema e sigurimit shëndetësor sipas këtij ligji”*.

Të drejtat e të dënuarve për trajtim në shërbimin shëndetësor parashikohen dhe në aktet ndërkombëtare. Kështu, në Rekomandimet e Komitetit të Ministrave të Jashtëm të Këshillit të Europës datë 12 Shkurt 1987 “Për Rregullat Europiane të Burgut”, ku në kapitullin që bën fjalë për Drejtimin e Sistemit të Burgjeve, në pikën 29 thuhet: *“Mjeku do të vizitojë dhe ekzaminojë secilin të burgosur menjëherë pas pranimit dhe më vonë sa herë të jetë e nevojshme, në mënyrë të veçantë për të zbuluar sëmundje fizike ose mendore dhe për të marrë të gjitha masat e nevojshme për trajtimin mjekësor...”* kurse në Pikën 30.1 thuhet: *“Mjeku do të kujdeset për shëndetin fizik dhe mendor të burgosurve dhe në përputhje me kushtet e intervalet e standarteve spitalore, do të vizitojë të gjithë të burgosurit e sëmurë, të gjithë ata që raportojnë për sëmundje, ose dëmtim dhe çdo të burgosuri t’i kushtohet një vëmendje e veçantë”*.

Në Pikën 32 të Rekomandimeve të mësipërme thuhet: *“Shërbimet mjekësore të institucionit do të kërkojnë që të diagnostikojnë e kurojnë çdo sëmundje ose të metë fizike e mendore, që mund të pengojë riinjetrimin e një të burgosuri pas lirimit. Për këtë qëllim, të burgosurit do t’i sigurohen të gjitha shërbimet e nevojshme mjekësore, kirurgjikale dhe psikiatrike, përfshirë ato që janë në dispozicion të komunitetit”*.

Shqetësimi i të paraburgosurit A. K., na duket i drejtë dhe si i tillë duhet të vlerësohet nga ana e juaj, me qëllim që në mundësitë e paraqitura të merren masat për kryerjen e ekzaminimit mjekësor të tij sa më parë.

Rasti i këtij të dënuari duhet të shikohet dhe vlerësohet në tërësinë e rrethanave të paraqitura që lidhen me gjëndjen jo të mirë shëndetësore, kufizimin e lirisë, kushteve jo

brënda standarteve të ambjenteve ku qëndrojnë të paraburgosurit dhe dënuarit në këtë institucion të cilat janë të njohura, dhe mandej detyrimin ligjor të organeve shtetërore për kujdesin shëndetësor të dënuarve.

Nga ana tjetër do të sugjerohet marrjen e masave për trajtimin dhe zgjidhjen në kohë të ankesave/kërkesave nga ana e që personeli mjekësor i Shërbimit Shëndetësor në IEVPenale “Shënkoll” Lezhë, duke verifikuar dhe evidentuar raste të tjera të mundshme të kërkesave të dënuarve që paraqiten me probleme të ndryshme të shëndetit, me shqetësimet e të cilëve duhet të informohet drejtorja e institucionit për të marrë masat e nevojshme për këtë qëllim.

Të paraburgosurit A. K., duhet t’i lejohet ushtrimi i riteve fetare të besimit që ai përfaqëson, për të plotësuar nevojat e jetës së tij fetare , shpirtërore dhe morale, duke ndjekur shërbimet ose takimet që organizohen në institucion si dhe duke mbajtur libra ose literaturë të nevojshme.

Për sa sipër duke gjetur se ankesa e të paraburgosurit A. K., është e drejtë, bazuar në nenin 63, pika 3 të Kushtetutës së Republikës të Shqipërisë ku thuhet: *“Avokati i Popullit ka të drejtë të bëjë rekomandime dhe të propozojë masa kur vëren shkelje të drejtave të njeriut nga administrata publike”* dhe në bazë të nenit 21 gërma “b” të ligjit nr.8454 datë 04.02.1999, “Për Avokatin e Popullit” me ndryshimet përkatëse ku thuhet: *“Avokati i Popullit pas përfundimit të hetimit, paraqet rekomandime për vënien në vënd të së drejtës së shkelur tek organi administrativ, që sipas tij, ka shkaktuar shkelje të të drejtave dhe lirive”*,

REKOMANDOHET

“Marrja e masave të menjëhershme për ekzaminim mjekësor, dhe ushtrimin e riteve fetare të paraburgosurit A. K., i cili ndodhet në IEVPenale “Shënkoll” Lezhë”.

Tërheqjen e vëmëndje së drejtuesve të IEVPenale “Shënkoll” Lezhë, për korrektesën në respektimin e kthimit të përgjigjeve të shkresave të Institucionit të Avokatit të Popullit, brënda afateve ligjore të kërkuara.

Për qëndrimin që do të mbani dhe masat që do të merrni në zbatim të këtij Rekomandimi, lutemi na njoftoni brënda afatit ligjor prej 30 ditë, e parashikuar në nenin 22 të ligjit “Për Avokatin e Popullit”.

Duke besuar në mirëkuptimin Tuaj.

K O M I S I O N E R I

Arben SHKËMBI

